

Date – 26/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Lengpui Airport Forum chuan Mizoram sorkar in Lengpui Airport chu Indian Air Force kuta a hlan chuan lak kir leh theih a ni tawh dawn lo an ti.
- 2. 16th Finance Commission member ten nimin khan Zoram Medical College & Hospital, Falkawn-a mi chu an tlawh.
- 3. Prime Minister Narendra Modia chuan khawvel dinhmun derthawng tak karah mithiamte chuan India chu chak takin hma a sawn an ringnghet tlat a ti.
- 4. Kisan Credit Card hmangin ramchhunga loneitu vaibelchhe 7 leh nuai 72 ten loan cheng vaibelchhe nuai 10 chuang an la tawh.

<><><>

LENGPUI AIRPORT FORUM

Lengpui Airport Forum chuan Mizoram sorkar in Lengpui Airport chu Indian Air Force kuta a hlan chuan, hnam rohlu, hruaitu hmasaten harsa taka an lo sual chhuah chu Mizoram in a chan kumkhua tawh dawn a, lak kir leh theih a ni tawh dawn lo an ti.

Lengpui Airport Indian Air Force kuta hlan a him lo tih lehkhabu-te an siam a, nimina an tlangzarhna kaihruaitu Lengpui Airport Forum hruaitu Pu Lalthlamuana Ralte chuan a sawi a, Mizoram sorkarin IAF kuta hlan ngei a tum avang leh IAF hnena hlanna tur ti fel tura ruat Working Committee chu February ral hma ngeia Draft Agreement ti fel tura tih an nih thu a sawi a, sum harsatna avanga IAF hnenah Lengpui Airport hlan a nih chuan hnam tan pawit thui tak a sawi dawn a ni an ti.

Lengpui Airport Forum chuan Airport Authority of India kuta Lengpui Airport hlan chu an duh dan ber a nih thu he hunah hian an sawi a, kumin January 24-a Aizawl Press Club-a chanchinbumite an kawm naah, 'Lengpui Airport Indian Air Force Hnen A Hlan Tum Chungchang tih lehkhabu-te (booklet) an lo tlangzarh tawh bawka.

Lengpui Airport Forum chuan Airport-a hmun pawimawh lai ber pahnih - Thlawhtheihna lut leh chhuak zawng zawng thununna hmunpui Air Traffic Control (ATC) Tower leh thlawhtheihna tumkawng (runway) te Mizoram sorkarin IAF kuta a puma a hlan chuan Mizoram sorkar chuan chung airport ti airport-tu berah thuneihna a nei zui thei tawh dawn lo a ni an ti.

Airport inpui (terminal building) atanga thlira tumkawng lehlam pang a airport ram chin zawng chu IAF in an chang dawn a, Mizoram sorkar tan inrawlh ngaihna a

awm tawh dawn lo a ni an ti a. Mizoram sorkar chuan airport inpui-te, airport venhimna (security) leh thlawhtheihna chuan man hralhna ah te chauh thu an neih tawh tur thu leh, thlawhtheihna lut leh chhuak kaihhnawih lo chinah chiah Mizoram sorkar in thu a nei tawh dawn a, IAF kuta Lengpui Airport pek a nih chuan Mizoram mamawh a phuhru pha dawn lo a, Mizoram tan thil pawl tak a thlen thei dawn an ti bawk.

(Corr-Chawnga)
<><><>

FINANCE COMMISSION

16th Finance Commission member ten nimin khan Zoram Medical College & Hospital, Falkawn-a mi chu an tlawh a, hetah hian Health & Family Welfare Minister Pi Lalrinpuii leh Secretary Pi Sangchhin Chinzah bakah ZMCH hotuten an lo dawngsawng a, ZMCH hmasawnna tur hrang hrang an sawi ho.

ZMCH Academic Block a Council Roomah inkawmhona ah hian Director Dr John Zohmingthanga’n presentation pe in ZMCH lo indin tan dan atanga an thlen chin te leh hmasawnna tur la awm leh an mamawh chi hrang hrangte a tarlang a, Health Minister Pi Lalrinpuii pawhin 16th Finance Commission chungah beiseina sang tak an neih thu a sawi a, ZMCH bakah Health & Family Welfare Department kaihhnawih thil pawimawh tak tak an hnena an thlente chu Mizoram hmasawnna atana pawimawh ber berte an nih avanga ngaih pawimawh sak tur leh a tihhlawhtlin dan kawng ngaihtuahsak turin a ngen bawk.

16th Finance Commission member te hian ZMCH fang kualin OPD, Laboratory leh Department hrang hrang an tlawh a, ZMCH hotute pawhin an dinhmun leh hmasawn theihna tur la awm ang angte a hmunah an hrilhfiah a ni.

ZMCH an tlawh hnu hian 16th Finance Commission memberte chuan Falkawn Bharat Nirman Rajeev Gandhi Sewa Kendra Hall-ah Falkawn Village Council hotute an kawm a, hetah hian 16th Finance Commission Chairman Dr. Arvind Panagariya chuan hovin LAD Director Pu Chauhnuna leh Falkawn Village Council member ten an lo dawngsawng a ni.

Falkawn Village Council hotute chuan Mizorama Village Council 800 chuang awm zingah an hun chep tak kara tlawh tura anni an rawn thlang chu Commission chungah an lawmthu an sawi a, Village Council inrelbawl na kalphungte sawifiahin an lo tawnhriat tawh atangin Mizoram pum huapa Village Councilte mamawh leh hmasawnna tur bakah hmalak dan thar tur atana tha ni a an hriatte 16th Finance Commission hnenah hian an thlen a, sawihona hun tha takin an hmang bawk a ni.

<><><>

100 DAYS CAMPAIGN

National Tobacco Control Programme and Mobile Medical Unit leh District Mental Health tangkawpin 4th IR Bn. Mamit Luangpawlah TB Umbo beihpui thlakna 100 Days Campaign Dr Lalhlunpuii, Sr. CMO hovin nimin khan hun hman a ni.

He hunah hian Dr. Lalhlunpuii chuan TB natna umbo tura veina tak tak nena hmalak chu thil tul tak a nih thu a sawi a, 4th IR Bn. hmuna awm mekte chu TB natna laka fihlim tura hmala tur leh TB natna chu langchhuak nghal mai lo a awm avangin TB natna laka kan fihlim leh fihlim loh kan chhungte/ chenpuite pawh intest-na chang hriat chu thil finthlak tak a nih thu sawiin, TB umbo na kawngah nasa leh zuala tanrual leh inven kan mamawh thu a sawi.

He hunah hian rilru hrisel, zuk leh hmuam do, TB umbona kawngah Pu Lalthlamuana Hrahsel, Psychiatric, District Mental Health, Dr Nancy Lalnunmawii, Consultant National Tobacco Control Programme, Pu Vansangliana, Senior Treatment Supervisor te'n subject thlan bik hmangin thusawina an nei a, Pu VL Hmangaihkima, Senior TB Laboratory Supervisor, National TB Elimination Programme kaihruaina-in TB do tura thutiam sawirualna neih niin Pu Hmingchungnunga, Senior DOT Plus TB, HIV Supervisor chuan lawmthu sawina a nei bawk.

Awareness Programme hman zawh hian TB screening leh Health checkup neih nghal a ni a, IR a hnathawk a awm zawng zawng endik nghal an ni.

Mamit District huamchhungah 100 Days neih mekah hian mi 3036 Vulnerable Group te Xray hmanga screen tawh an ni a. Heng zingah hian khaw 5 atangin mi 7 TB vei hmuhchhuah an ni tawh. Campaign hi March 2025 thla tawp hma a neih zawh hman tum a ni.

(RD Darthanzauva Mamit PTC)

<><><>

AIZAWL DAY

Ni thum awh tur Aizawl Day lawmna chu Aizawl Sipai Lammualah neih mek a ni.

Nimina Aizawl Day Lawmna hawngtu Aizawl Mayor Pu Lalrinenga chuan Aizawl khawpui chu ni 25 February kum 1890 atang khan mei mit lova luah lum nia chhinchhiah a ni a ti a, Chumi champaha chu Aizawl Day chu niin; Aizawl khawpui din cham chu Aizawl Mihlun Thlahten an lo lawm thin thu a sawi a, kum 2023 atang khan Aizawl Municipal Corporation kutah Aizawl Day lawmna chu tla in AMC hmahruaina a lawm thin a nih tak thu Pu Lalrinenga chuan a sawi a ni.

(BYTE)

AMC chuan Aizawl Day lawmna pualin thalai infiammite tan Mayors’ Cup huaihawt thin in, kuminah hian Basketball inelna buatsaih a ni a, Ward 14 aiawh Khatla South Local Council ten Mayors’ Cup – Trophy leh pawisa fai Nuai 1 an hlawh chhuak.

Aizawl Day pual hian intihsiakna hrang hrang siam niin, Quiz inelna te, faina lama thawk tha chawimawina te, hotel leh restaurant fai thlan chhuah te, AMC chungchang documentary tawi insiamsiak chawimawina te hlan an ni a. College Quiz inelnaah Govt. Mizoram Law College te chu pakhatna niin citation, momento leh pawisa fai cheng sing 7 an dawng a, hotel fai lawmman dawngtu Ransom Hotel – Thuampui Vengthar te chuan citation leh pawisa fai cheng singkhat an dawng a, restaurant fai lawmman dawngtu Donum Dei, Dawrpui Vengthar ten citation leh pawisa fai cheng sang nga an dawng a, AMC chungchang documentary tawi

insiamsiakah FC Lalchhuanawma chu pakhatna niin citation leh pawisa fai cheng singruk a dawng tel a ni.

(Kan corr report lo ngaithla ang.)
(VC)

(Corr-Chawnga)

<><><>

KVK

Lawngtlai District a Scientific Advisory Committee chu nimin khan an Chairman Pi Ramdinliani, Special Secretary, Agriculture & Farmer Welfare Department hoin an thukhawm.

KVK Chawnhu, Lawngtlai Conference Hall-a hun hmanah Pi Ramdinliani chuan KVK hmalakna chu fakawm a tih thu a sawi a, mithiamten ngun taka an enchhin a, kuthnathawktute tan hmalakzuina tlak an chhawpchhuak thin chuan nasa takin kuthnathawktuten an tangkaipui hle a ni a ti a, Mizoram a KVK pasarihte chu State sorkar enkawl an ni a, thawktute pawh mahni hnam tawnga biak theih an nih deuh vek vangin Kuthnathawktute nen thawhdunna ah kawngro a sunasa hle a ni a ti bawk.

Meeting-ah hian Dr. C. Lalfakawma, Senior Scientist & Head, KVK, Lawngtlai chuan kum kallai 2024-25 chhunga KVK, Lawngtlai hnuaia Kuthnathawktu dawmkan nana hmalakna hrang hrang an neihte a sawifiah a, hmalakna hi hlawm hrang hrang pali hnuaiah Scheme leh Project thahnemtak awmin, an hmalaknate chu Kuthnathawktuten an chhawr tangkai hle niin a sawi.

Scientific Advisory Committee ah hian KVK, Lawngtlai hnuaia Subject Matter Specialist ten kum thar, 2025-26 a hnathawhtur leh hmalakna tur hmachhawp an neihte ansawifiah a, heng ruahmanna awmte hi Committee chuan a pawm.

Scientific Advisory Committee ah hian State leh Lai Autonomous District Council a Agriculture leh a kaihnawih Department hotute bakah he Committee a telsa member dangte leh Kuthnathawktu thenkhatte an tel.

(Lalnggheta Ralte, Lawngtlai PTC)

<><><>

LMC

Lunglei khawpui chhung bawlhhlawh paih leh sawngbawlina hmun tur, Pukpui to Lunglei ATL road thlang a mi chu nimin khan Lunglei Municipal Council (LMC) hotu leh MJA ten an tlawh.

LMC chairman Chairman Pu Lalzuithanga leh a thawhpuite bakah MJA te hun hmanna hi Solid Waste Management Centre Pukpui tih niin Estimated amount nuai 698 a ni a, civil works bikah Rs nuai 385 vel a ni a, a thawktu hming hi LHM Infra Aizawl a ni.

Resource centre hi meter 29.5 a thui niin a vang lam hi meter 17 a ni. DUDO leh LMC Secretary ni bawh Pu Lalrinawma chuan sak zawh a nih hun a hman dan tur chungchang sawiin, chhawng hnih tur niin a hnuaia zawh chu wet waste niin a chung zawh dry waste atana tih a ni a ti. Tawih thei lo te chu khawl hmanga chansawm vek hnuaah bag ah khawl a pack a ni ang a, belt hmangin a dahna turah te dah a ni ang a, thil dang siam nan a hman leh theih dawn a ni a ti. Bottle ruak leh plastic lam chi chu chansawm vek theih tur a ngaih a ni. Bawlhhlawh hi mei a hal kan phal loh a ni ang a, tih ral theih loh chu land field-ah dah thlak zel a ni ang a, hei hi chu tam lutuk lo tur a ngaih a ni a ti.

Bawlhhlawh sawngbawlna Pukpui ami hi kum 2 chhunga peihfel tur a tih a ni. Hetihlai hian Saizaikawn thlang a Bawlhhlawh sawngbawlna chu peihfel vek tawh niin LMC kutah erawh hlan a la ni lo.

(Thanghmingliana, Lunglei PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar hi puan leh a ni ang.

<><><>

DIG NR

State chhunga Police Station hrang hrang atangan Phone bo chhui chhuah 875 a awm a, Ministry of Communication hnuai Department of Telecommunications-in a siam CEIR Portal hmangan Mobile Phone rukbo/tihbo 110 chhuichhuah a ni tawh bawk. Nimin khan DIG (NR) Pu C.Lalthanmawia chuan Aizawl SP Office chei that a hawng a. Hetah hian tunhnaia Aizawl District-a Mobile Phone rukbo/tihbo CEIR Portal hmanga chhuichhuah thenkhat te chu a neitute kutah a hlan nghal a ni.

Mobile Phone rukbo hi Police Station-ah complaint dawn nasat leh thil thleng hluar em em a ni a, hemi avang hian ngawrh taka chhuichhuah hna kalpui thin a n a, Kum 2023 chhungin- 559, Kum 2024 chhungin-299 leh kumin February thla thleng khan - 17 chhuichhuah a ni. Police Station hrang hrang atanga Phone bo chhui chhuah 875 bakah hian Ministry of Communication hnuai Department of Telecommunications-in a siam CEIR Portal hmangan Mobile Phone rukbo/tihbo 110 chhuichhuah a ni tawh bawk. Mobile Phone bo chhui hna hi ngawrh taka kalpui mek zel a ni a. Hengte hi a neitute hnenah pek kir zel a ni.

He hun hmanna-ah hian Pu C.Lalthanmawia chuan Aizawl SP Office hnuai CEIR Portal enkawltu leh phone chhuichhuahna kawnga hma latu ber Constable Lalchhuansanga Khawhling, Crime Branch, SP Office, Aizawl hnenah lawmman a hlan nghal bawk.

(DIPR)

<><><>

PM

Prime Minister Narendra Modia chuan khawvel dinhmun derthawng tak karah mithiamte chuan India chu chak takin hma a sawn an ringnghet tlat a ti. Nimina Advantage 2.0 Investment and Infrastructure Summit, Guwahati a a hawannaah he thu hi sawiin Pu Modia chuan thalai tam takin thiamthil tha tak tak an neih avang leh ngaihtuahna thar hman kawngah hmahruaitu an nih avangin India chuan chak takin hma a sawn a ti a. Sawrkar laipui chuan hmarchhakah inkalpawhna, hmasawwna ruhrel leh tualchhunga bungrua chetvelna kawnga hmasawwna thleng turin theihtawp a chhuah a ni a ti bawk.

Prime Minister Narendra Modia chuan Assam chu hmasawnna tura theihna tam tak nei leh South East Asia leh India inkalpawhna tur chhuahka pawimawh tak a ni a ti a. Pu Modia chuan Assam chu India khawchhak lamah thilsiam chhuahna hmunpui ber ala ni dawn a ti a. Industry lama thuneitute chu he theihna hi hmang tangkai turin a ngen nghal a ni.

Prime Minister chuan India chuan pen khat zelin hma asawn tih sawiin kum 25 chhung thlir lawk chungin hmalakna lian tak tak a nei a ti a.

Ni 2 awh Summit ah hian ministerial session pasarih leh thematic sessioni 14 neih tur a ni ang.

(Newsonair)

<><><>

KCC

Kisan Credit Card hmangin ramchhunga loneitu vaibelchhe 7 leh nuai 72 ten loan cheng vaibelchhe nuai 10 chuang an la tawh. Kisan Credit Card (KCC) hi bank kaltlanga loneituten an mamawh chi hrang hrang thlai chi,leitha leh hlo tur lei nana loan an puk theih a ni a. Sawrkar laipui chuan loan pun zaa 7 atangin zaa 1.5 chu an tum sak tih Union Finance Ministry chuan a sawi a. Hei bakah hian tha taka loan rul thei te chu zaa 3 in a pung hi tihtlem a ni a. Kum 2014 atangin KCC loan pek zat hi a letin a pung tih sawiin cheng vaibelchhe 4.26 atangin cheng vaibelchhe nuai 10 a kai tawh tih Union Finance Ministry chuan a tarlang bawk a ni.

<><><>